


ZAKAI, MOTO YA MOMBONGO

 Bato nyonso batatoli na mpokwa oyo, balobeli makambo minene oyo babikelaki. Pe nasepeli solo na makambo yango. Pe emonanaki lokola moto nyonso azalaki koloba na lolenge ya mwa kosekisa.

² Pe nakobakisa oyo ya ngai na yango. Ndenge mwasi ya moindo oyo alingaki kotatola eleki mwa ntango, alobaki: “Mpaka, nakoki kotatola?”

Nalobaki: “Sala yango.”

³ Bongo alobaki: “Na—na—nazali te oyo na—oyo nasengelaki kozala, pe—pe na—pe nazali te oyo nalingi kozala,” alobaki, “kasi nazali pe ndenge nazaláká te.”

⁴ Boye nde ndenge yango nazomiyoka na kati na etonga ya boye. Nazali oyo nasengelaki kozala te, to oyo nalingi kozala te, kasi nayebi eloko moko, nazali oyo nazaláká te. Pe nazali kobila kino nsuka mpo na Ebiangeli monene yango.

⁵ Esengo mpenza kozala awa. Tolekisaki moko na bangonga ya malamumu mingi koleka ya boyokani na bondeko elongo na bandeko na biso, kuna na Maricopa Valley, mposo mibale oyo ya suka. Mongongo na ngai ekauki. Pe tomonaki Tata na biso na Likolo kosala makambo minene mpo na biso. Pe tozosala bobele boye mpo na komema bato na kobondela, pe kotalela makambo minene oyo ekosalema na likita oyo. Ntango . . .

⁶ Nayokaki ete bapesaki ngai libaku ya koya na eyanganelo oyo, elongo na moninga na ngai malamumu, Ndeko Tony. Pe natunaki mbala misato, na mpokwa oyo, ndenge nini batangaka nkombo yango? Pe na—nazokoka mpenza te. Boye na bokuse “Tony,” soki eza likambo te. Nakanisi awa tolandelaka yango mpenza te, boye te? Boyebi, ezali lokola likambo ya Nzambe. Boyebi, Biblia elobi: “Nzambe azali na lolenge moko boye te.” Boye biso pe tozali na lolenge moko boye te.

⁷ Komona makambo minene oyo Tata na biso na Likolo asali mpo na biso na mposo oyo, tozali na esengo ya koya awa pe kokabola mapamboli yango na eyanganelo oyo, pe kokutana na bandeko mosusu, pe bino bato ya ngambo oyo ya—ya Arizona. Oyo, biso nyonso toyebi, awa boye, ete oyo ezali engumba mokonzi. Nayebisaki bango mposo mobimba ete Phoenix ezalaka na yango mboka ya pembeni na Tucson. Bomoni? Balingi kondima yango te, kasi tobengisi bango na lisanga na bondeko na biso. Ezali mpo, tozali mpenza likolo mingi. Basengeli mpenza kotalela biso, boyebi, biso awa na Tucson. Na yango bino nyonso boya, pe tokokende kotala

Phoenix, na mposo ekolanda, to na suka na mposo oyo, mpo na ngonga oyo ya boyokani kati na bondeko kuna.

⁸ Tomonaki likambo moko monene kosalema kaka liboso nasala mobembo oyo. Nakolinga kozua se mwa ngonga moke mpamba te nakanisi ete ekozala na litomba. Ngai. . .

⁹ Na kosaláká mibembo mibu nyonso oyo pe komekáká kotelema kati-kati na bibongiseli pe bato ya ndenge na ndenge, ba-Hommes d’Affaires Chretiens ezalaki lokola mwa esika ya ekimelo mpo na ngai, ya kondima ete Nzambe azalisaki mabota nyonso na makila moko. Pe na—nandimaka yango. Nandimaka ete bato na Ye bazali na mangomba nyonso. Soki Azali mpenza Nzambe, Azali Nzambe ya mabota nyonso, Nzambe ya bokeli. Pe Akoki solo mpenza. . . Bótala biliki pe bangomba, bokoki komona oyo Ye alingaka, mpamba te Amitalisaka Ye moko na bokeli na Ye. Pe tokoki komona ete Nzambe azali. Pe bato oyo, ba-Hommes d’Affaires Du Plein Evangile, ntango nakendeke na mayangani na bango, koteya mpo na bango, boye yango epesaka ngai libaku malamumu ya kosolola na bitonga ndenge na ndenge, elongo moko.

¹⁰ Nabengamaki, na oyo tokoki koloba na elobeli ya mokili, kozwa esika ya Demos Shakarian. Boyebi éyé yango ezali mpenza—mpenza mokumba. Kasi nazalaki na Cincinnati eleki mwa mikolo, pe Ndeko mwasi Shakarian, ndenge nasosoli, alekaki na lipásó. Ndeko Miner Arganbright, moko na bakambi, ayaki pe alobaki: “Yaka na Cincinnati na motuka elongo na ngai.”

¹¹ Nalobaki: “Nazali na bato nkama na nkama oyo balali awa, bauti na mokili mobimba, balali na ba-lopitalo oyo pe na ba-ndako, bazozela nabondela mpo na bango. Bazali kozela tosolola, bamosusu ntango mosusu basali mibu mibale to misato, kozeláká, pe sukasuka bayei awa.”

Pe alobaki: “Ee, yaka elongo na ngai kaka mpo na ngonga moke.”

¹² Nalobaki: “Ee, bilei ya ntongo ekozala ntongo nini?” Ezali penepene kilometre nkama na ntuku libwa na mibale, nabanzi, longwa na esika navandaka.

Pe alobaki: “Ee, ekobanda pene na ngonga ya mwambe.”

¹³ Nalobaki: “Ee, nakoloba boye. Tokolongwa, pene na ngonga mine ya ntongo, pe kokoma kuna mpo na bilei ya ntongo. Nakosala noki názonga mbala moko.”

¹⁴ Pe ntango nakomaki kuna, Ndeko Shakarian azalaki wana te. Bongo nakotaki. Balobaki: “Nde oyo tozalaki mpenza koluka!” Bongo na butu wana, na ngongo moko boye, esengaki názonga ndako.

¹⁵ Na ntango wana, ezalaki na motei moko ya Baptiste oyo azalaki kotia mwana na ngai Billy mbamba, pe alobaki: “Misié,

yo ozososola te.” Alobaki: “Mwasi na ngai azali kobunda na liwa.”

¹⁶ Pe alobaki: “Ee, misié, ntango papa akozonga.” Alobaki: “Tozali na lotómo epai na bato oyo, tosengeli kokende.”

¹⁷ Boyebi, na molongo ya mabondeli, mbala mingi, nakolekiséká bato pe ntango mosusu tobondelaka mpo na bango. Kasi bino. . . Pe mbala mosusu likambo moko ekozala na bozindo ya koleka wana. Bomoni, Nzambe abikisaka kolandana na mibeko, pe ntango mosusu likambo moko ekoki kozala na bomoi na moto wana. Etali ngai te nkisi boni monganga akopesa bango, baktikaláká kobika te kino ete bábongisa naino likambo yango.

¹⁸ Soki okei na biró ya monganga pe oyebisi ye ete ozobela, pe oyebisi ye bilembo ya bokono na yo, soki azali na ntango te, ntango mosusu akokomela yo bobele nkisi moko boye, oyo ekoki kopekisa nzoto koswa, eloko moko, lokola aspirini. Na ntango wana monganga yango azali nde koluka kosilana ná yo, mpo azali na ntango te. Monganga ya malamú solo-solo, liboso ápesa yo nkisi, akoyekola likambo yango malamú, na bozindo mpenza, kino áyeba eloko oyo ezali kotungisa yo, na sima nde apesi yo nkisi.

¹⁹ Pe mbala mosusu tomonaka bato koleka na molongo ya mabondeli, kuna na bikolo ebele, bakoya mbangu pe bakanisaka ete Nkolo asengeli kobikisa bango mbala moko wana. Kasi ntango mosusu likambo moko ezali kuna na nse, boye tokoumela liboso na Nkolo kino Ámonisa yango, nini yango ezali. Eloko moko esengeli. . . Likambo nyonso ezalaka—ezalaka na ntina. Pe osengeli koyeba ntina na yango, liboso, na sima nde okoki koyeba eloko nini kosala.

²⁰ Pe elenge oyo akobaki kotia molende. Pe nazongaki ntongo oyo elandaki pene na ngonga ya mibale. Bongo pene na ngonga ya mitano, mwana na ngai abengaki ngai, pe alobaki: “Oyebi elenge mwasi moko na nkombo Jeanne Dyer?”

Nalobaki: “Jeanne Dyer, ezolobela ngai eloko moko.”

Alobaki: “Ye mwasi yango alobaki ete azalaká kobetela yo piano.”

²¹ “Ô,” nalobaki: “Ezali te Dr. Dyer, monganga oyo ya lipáso, monganga ya lipáso moko ayebana awa na Louisville?”

²² Alobaki: “Ezali—ezali bongo. Ee, mwana na ye ya mwasi Jeanne azali kobunda na liwa kuna na lopitalo Saint Edwards na. . . to pe, na lopitalo Saint Anthony, na Louisville.” Pe alobaki: “Mobali na ye aláli kuna na ebutelo mokolo mobimba.”

“Ee,” nalobaki: “ee, nakomeka kotala likambo yango lelo.”

²³ Alobaki: “Sikawa ayebi te ete azali na cancer. Koyebisa ye yango te.”

24 Bongo, sukasuka, na mokolo yango, ntango nakomaki na chambre yango, azalaki elenge mwasi moko malamu.

25 Abeteláká ngai piano, na . . . ntango nazalaki na auditorium, esika namonaki bato ya Ndeko Allen, awa na mpokwa oyo. Ndeko Allen auti kozala na auditorium moko wana na Louisville. Ezali nde Memorial Auditorium Pe Jeanne Dyer azalaki mobeti piano na losambo Porte Ouverte, sinagoga ya kala. Na yango, amonáká mwa makambo minene oyo Nkolo Nzambe asaláki. Ayebisaki yango tata na ye.

26 Ye alobaki bobele: “Ezali na yango psikologi solo. Moto yango azali kotanga bobele makanisi ya bato. Ezali . . . Abanzaki-banzaki yango kaka.”

27 Ye alobaki: “Tata, ekoki kozala bobele kobanza-banza ntango nyonso te.” Bomoni? Alobaki: “Ekoki kozala bongo te.”

“Ee,” alobaki: “Jeanne, bosana makambo wana.”

28 Pe ye abandamaki na elenge mobali moko oyo azalaki kotanga na likindo ya ba-Baptiste na ntango wana. Abalaki pe akendeki kovanda na Rockford, na Illinois, esika mwana mobali yango azalaki kovanda. Pe na lolenge moko boye to mosusu amekaki kobatela litatoli na ye. Kasi mwana mobali yango azuaki mosala libanda na makambo ya losambo, pe sima na ntango moke, atángwanaki mosika na Nkolo.

29 Mwana mwasi yango azwaki mpa—mpasi ya basi. Azongaki ndako epai na tata na ye. Ayebaki ete esengelaki básala ye lipaso. Na kati na ye amonaki oyo babengaka . . . Pe nayebi nkombo minganga babengaka yango te, kasi, mpamba te nayebi ete minganga mibale to misato bavandi awa sikawa. Na yango, ebengamaki, lokola, tumeur ya chocolat. Pe ezali . . . Na kati, ntango alongolaki yango, esalaki ete mwa ndambo na yango esopanaki. Pe biteni mike epanzanaki. Pe basonaki ye, balekisaki ye na radiographie pe azwaki lialisi.

30 Bongo, ntango azongaki ndako, akobaki koyoka mpasi pe mitungisi.

31 Sima na mobu moko, azongaki mpo bálongola ye uterus nyonso. Pe ntango balongolaki binama yango, bamonaki ete cancer yango ekendaki kino na mosopo ya monene pe ezingaki yango. Eloko ya kosala ezalaki te. Bamekaki radiographie lisusu. Esimbaki te. Boye bamemaki ye bobele na lopitalo pe bayebisaki ye ete azalaki kaka na mpasi makasi ya basi, pe bazalaki komeka kosalisa yango. Pe mwana mwasi yango azalaki kobunda na liwa.

32 Mobali na ye ayebaki yango. Na yango azuaki ndambo ya ba-buku na ngai, oyo Jeanne atangáká. Bongo abandaki koya na lopitalo, kotangela ye yango.

33 Pe ntango tokotaki mpo na kobondela mpo na ye, abandaki koyebisa ngai yango. Nalobaki: “Jeanne, ye azali mwana mobali

moko malamumu.” Pe nalingaki te ko . . . Nabombaki sekele yango, mpo nayebaki ete—ete ye . . . Ayebaki te ete azalaki na cancer. Pe bongo, sima na mikolo mibale, esengelaki básala co—colostomie. Bongo na komemáká . . .

³⁴ Liboso bámema mwana mwasi yango, ee, bapesaki ngai nzela ya koya kobondela mpo na ye. Namemaki ye na chambre. Pe kaka ntango nako . . . Lifulume moko mozangi kondima azalaki kosala mosala; bazalaki na mafulume misato, bazalaki kokitanelana sima na ngonga misato. Pe bobele ntango tokabwanaki na lifulume yango, pe tobimisaki ye libanda ya chambre, boye emononeli ekokaki koya, bongo tobondelaki wana elongo na ye mwa moke, pe namonaki ye. Azali na nsuki moindo. Azali bobele na mibu pene na ntuku misato na motoba. Nsuki moindo ekomaki mwa pembe. Azalaki ya kotelema kati na emononeli yango.

³⁵ Nalobaki: “Jeanne, sikawa, tálá. Nakozala mpenza sembo ná yo.” Nalobaki: “Osilá kozala na mayangani ngonga ebele mpo na koyeba ete nakokoka koyebisa yo eloko moko te na Nkombo na Nkolo soki yango ezalaki bongo te.” Nalobaki: “Sikawa, Jeanne, ozali na cancer.”

Alobaki: “Ndeko Branham, nakomaki kokanisela yango.”

³⁶ Pe nalobaki: “Lipásó wana, oyo ekosalema sima ya lobi, ekozala colostomie. Kasi, komitungisa te. Nauti komona, uta na Nkolo, ete okoyoka malamumu.” Pe asepelaki solo. Bongo nazongaki ndako.

³⁷ Pe mokolo oyo elandaki balingaki, sima ya mokolo elandi, kutu nde, balingaki komema ye mpo na colostomie na ntongo yango, pe esengelaki bá—esengelaki bázela mwa miniti mpo balengela ye, pe bongo na bongo, pe bakomaki pene na kokende. Pe ezalaki na . . . Ayokaki zongo ndenge bato nyonso bayokaka na ntango wana, pe bamemaki ye na ndako ya zongo, pe asalaki zongo nyonso, malamumu mpenza. Monganga akamwaki mpenza. Atalaki ye lisusu malamumu. Na ntongo oyo elandaki . . . Batikaki yango, bakataki lipásó yango. Ezalaki Dr. Hume, mosali lipásó ya mayele mpenza, monganga, moninga na ngai, nde alingaki kosala lipásó yango.

³⁸ Bongo na ntongo oyo elandaki asalaki lisusu zongo mobimba, malamumu mpenza. Pe tata na ye, Dr. Dyer, abengaki ngai na telefone. Na kati na kolela, alobaki: “Ndeko Branham, nazalaki kotiola makambo oyo ozalaki koloba.” Alobaki: “Sikawa nakomi mondimi, ete Nzambe na Abalayama, Yisaka, pe Yakobo azali naino na bomoi.”

³⁹ Azalaka ntango nyonso Nzambe, Atikali se Nzambe. Pe toyebi ete Azali monene awa na Tucson ndenge pe Azali bipai nyonso, mpo Azali bisika nyonso, na nguya nyonso, pe azangi suka, pe toyebi ete Akoki kosala makambo nyonso.

⁴⁰ Sikawa, nakozua bino mpenza ntango molai te. Na momesano, mingimingi mpenza te, ntango ngai. . . Soki esengi náteya, ô, nakosala mpenza ete bóbima okati na ngonga motoba. Oyo wana nde liteya ya mokuse. Kasi nakosala yango na mpokwa oyo te. Nakozala na mayangani, lobi na mpokwa, na mpokwa ekolanda, pe bongo na bongo. Tokomeka. . .

Tozomilengela mpo na kokende lisusu bikolo mosusu, soki Nkolo akolinga, kala mingi te.

⁴¹ Nalingi koyebisa bato nyonso awa, baninga, mbala mosusu bamosusu kati na bino nakutáná na bino, pe ntango mosusu ebele awa oyo nakutáná na bango te. Napesi bino mbote na Nkombo na Nkolo na biso Yesu, Mwana na Nzambe. Tika kimia na Ye ézala na bino libela.

⁴² Pe lokola nalobaka na biyanganelo oyo mbala na mbala, esalaka ete bato bá. . . lokola bandeko na ngai batei oyo, báloba. . .

⁴³ Moto moko alobaki na ngai mokolo moko, alobaki, “Billy, ee, eloko nini—eloko nini esalaka ete ókangama na etonga ya bato ya mombongo wana?” Alobaki: “Nakanisaki ozalaka motei.”

“Ô,” nalobaki: “Na—nazali moto ya mombongo.”

Alobaki: “Moto ya mombongo?”

Nalobaki: “Ya solo.”

Alobaki: “Na—na—nayebaki yango te.”

Nalobaki: “Iyo, nazali moto ya mombongo.”

Alobaki: “Mombongo ya ndenge nini osalaka?”

⁴⁴ Nalobaki yango mbangu-mbangu, mpo ye. . . Nalobaki: “Nasalaka na assurance ya Bomoi.”

Alobaki: “Nini?”

Nalobaki: “Assurance ya Bomoi.”

Alobaki: “Olingi koloba nini?”

Nalobaki: “Assurance ya Bomoi ya Seko.”

⁴⁵ Sikawa, soki moto moko kati na bino alingi kosolola na ngai likolo na yango, nakosepela kokutana na yo sima na losambo. Nazali—nazali awa mpo na mosala ya mombongo yango.

⁴⁶ Nakanisi lisusu moninga na ngai moko, nkombo na ye ezalaki Snyder. Totangaki na ye elongo. Pe sikawa, ba-assurance, nazalaka na moninga moko oyo azalaka na mosala ya kotekisa ba-assurance. Nazali na ndeko moko asalaka mosala ya kotekisa assurance, kasi na—nazalaka mpenza na ba-assurance te. Na yango nazali. . . Ye Wilmer Snyder oyo, moninga na ngai, moninga ya bomwana, ayaki epai na ngai kala mingi te, pe alobaki: “Tala, Billy,” alobaki: “Nalingi kosolola na yo na ntina na ba-assurance.”

47 Nalobaki: “Tala, Wilmer.” Nalobaki: “Yoka. Tosolola nde likambo ya bokila.”

Alobaki: “Te, nalingi tosolola likambo ya ba-assurance.”

48 Ee, esengelaki pe nalobela ye yango mbangu-mbangu. Nalobaki: “Nazali na assurance.” Ba-assurances te, kasi assurance, bomoni.

49 Pe mwasi na ngai atalaki ngai, lokola áloba: “Tala, ozobeta masapo.” Ye ayebaki ete nazalaka na assurance moko te.

50 Pe alobaki: “Ô, limbisa ngai, Billy.” Alobaki: “Ezali solo. Ndeko na yo asalaka mosala yango. Nayebi Jesse.”

Pe nalobaki: “Ee,” nalobaki, “ezali mpenza mpo na ye te.”

Alobaki: “Ozali na ba-assurance ya ndenge nini?”

Pe nalobaki, nalobaki: “Nazali na Bomoi na Seko.”

Alobaki: “Na nini?”

Pe nalobaki: “Na Bomoi na Seko.”

51 “Ee,” alobaki: “Nandimi te ete nasilá koyoka lisolo na kompanyi wana.” Alobaki: “Te. Ezali likambo ya kokamwa.”

52 Pe nalobaki: “Wilmer, tala likambo ezali boye.” Nalobaki: “Ezali nde assurance oyo epambolami, Yesu azali wa ngai. Ô, Elengi mpenza koléka nkembo na Nzambe! Nazali mosangoli ya lobiko, nasombami na Nzambe, nabotami na Molimo na Ye, nasukolami na Makila na Ye.”

53 Alobaki: “Oyo wana ezali mpenza malamumu, Billy, kasi yango ekokotisa yo na lilita te.”

54 Nalobaki: “Kasi ekobimisa ngai. Nazali te—nazali komitungisa mpo na kokota kuna te. Ezali likambo ya kobima kuna, nde yango nazokanisa.”

55 Sikawa, soki ozali na mwa mitungisi, nakosolola na yo na ntina na yango. Tósolola kaka mwa—mwa moke na ntina na Likomi, atako ezali mpo na bato ya mombongo. Kasi ngai moko namikokanisi ná bino lokola moto ya mombongo.

56 Pe namonaki ebele na bandeko na ngai ya batei awa, kotelema, kala mingi te. Pe na yango ntango mosusu, soki Nkolo alingi, nakosepela koya kosangana na etonga yango mpo na kozala na liyangani moko malamumu elongo na batei yango awa. Nayebi elenge ndeko moko awa. Nakutanaki na ye. Nabanzi, nkombo na ye ezalaki Whittle. Tozalaki elongo kuna, na ntango moko boye. Boye, natangaki pe nkombo yango mabe. Ayebisaki ngai ete ezali likambo te.

57 Na bongo pe nkombo na ngai ezali Bran-ham, boyebi. Moto moko ayebisaki ngai, alobaki: “Ozali . . . Ndeko Bran-ham, ozali na bondeko moko boye ná Abraham?”

Nalobaki: “Mwana na ye.”

58 “‘Tata na mabota.’ Wana tokufi kati na Klisto, tozali momboto na Abraham, basangoli libula elongo na ye kokokana na elaka.” Likomi yango nde wana.

59 Sikawa, nazali na ntango ya kokanga bino awa te, mpo na koteya, mpamba te bato ya Ramada bakopesa bino lisusu esika oyo te.

60 Bongo nakanisi lisusu mbala ya liboso oyo nayaki epai na ba-Pentekotiste, eleki mibu ebele, nazalaki na Mishawaka. Bitonga na bango ezalaki mibale. Moko na yango ebengamaki, nabanzi A. P. ya M.; oyo mosusu, A. P. ya Y. K., nabanzi. Pe basalaki likita na bango—na bango na ngambo ya nordi, mpo kokabwana ya loposo ezalaki, pe na boye bandeko baindo bakokaki koya na liyangani yango. Natalaki bango mokolo mobimba, bazalaki ndenge mosusu, bazalaki na bizaleli ya losambo te. Oh! la la! Navandaki wana, pe biso ba-Baptiste, boyebi, tomekaka kosala makambo lokola esalamaka kati na losambo. Kasi baninga oyo bazalaki na bizaleli ya ba-Baptiste ata moke te, to na bizaleli ya losambo moko te. Bakokaki kopota mbangu, koganga, kobelela, kino elongi ekoma bleu. Pe namilobelaki: “Oh! la la!, Oh la la!” Bongo nabandaki kotala malamumu ndenge bazalaki kosala makambo.

61 Pe bongo alobaki: “Batei nyonso, báya na etumbelo. Motei nyonso, ata ya denomination nini, ámata na etumbelo na mpokwa oyo.” Tozalaki pene na nkama mitano kuna na etumbelo. Bongo alobaki: “Telema kaka pe loba nkombo na yo, pe vanda.” Na—nayaki, na ntango na ngai. Na—nalobaki nkombo na ngai, pe navandaki. Pe ekobaki bongo. Sima na mwa ntango, bazwaki moto moko. . . Bazalaki na batei ya malamumu mokolo wana. Ô, bazalaki mpenza bato batangá mingi, pe bato solo. Pe nayebaki ete nazalaki na eloko ya kosala kuna te, ngai moto nasuká na école primaire, kotelema liboso na bato wana, ntango bakobanda koloba na ntina ya likindo.

62 Kasi namilobelaki: “Ee, mpo na liyangani ya mpokwa oyo, bakozwa ya solo mpenza matei na bango ya malamumu koleka mpo na mpokwa oyo.”

63 Bongo, sima na ntango moke, balobaki ete mobange songolo moto akoteya. Ezalaki mobange moko ya moindo, nde ayaki. Pe amonanaki lokola moto ya mibu ntuku mwambe na mitano. Pe alataki kazaka wana ya kala ya molai, oyo tomesanaki kobenga na sudi, kazaka ya batei, boyebi; na mokila na sima, boyebi, na basinga zinga-zinga. Mwa suki ya pembe zinga-zinga na motó na ye. Pe esengelaki bákamba mobange yango kuna, azalaki mobange mpenza.

64 Pe apusanaki wana pe azwaki litangi na ye na Yobo. Alobaki: “‘Ozalaki wapi ntango Natiaki moboko ya mokili? Yebisa Ngai esika moboko na yango ekangami.’” Alobaki: “‘Ntango minzoto na ntongo ezalaki koyemba elongo, pe bana na Nzambe bazalaki

koganga na esengo,” alobaki: “yo ozalaki wapi?” Nzambe ákoyebisa Yobo.

⁶⁵ Ee, bandeko nyonso mokolo wana bateyaki na ntina na Bomoi ya Klisto, pe boyei na Yoane, bakangisaki yango nyonso mibale, pe bongo na bongo, na ndenge ya mayele mpenza.

⁶⁶ Kasi mobange oyo ateyaki eloko moko te na oyo ezalaki kosalema awa na mokili. Azongisaki Ye mosika kuna na sima, koleka pene na mibu milio zomi liboso mpenza mokili ezalisama. Pe amemaki Ye, na oyo ezalaki kosalama na Lola, sima akitaki pwasana na monama. Asalaki nyonso wana na miniti soko mitano, pe ezalaki lokola apemaki kaka mbala moko. Ntango asilisaki, apumbwaki likolo pene na metre moko, ndenge emonanaki, mpo na ngai, pe atutisaki matindi ya sapato na ye. Abandaki kobaluka-baluka na lombangu mpenza. Pe azalaki na esika monene koleka oyo mbala mibale. Alobaki: “Bozali mpenza na esika ya kokota te awa mpo ngai náteya,” pe avandaki na ye.

⁶⁷ Namilobelaki “Wana nde eloko oyo nasengeli na yango. Soki ekoki kosala ‘te mobange amiyoka ndenge wana, bongo ekozala boni mpo na ngai soki nazwi liziba wana ya bolenge?”

⁶⁸ Mobange, ya mibu ntuku mwambe na mitano, oyo akokaki kosala makambo ndenge wana! Ee, oh! la la!, ntango ayaki wana, esengelaki basimba ye. Kasi namonaki ete ntango Molimo yango ekangaki ye, azongelaki bolenge na ye lokola mpongo, boyebi.

⁶⁹ Sikawa nalingi kotanga mwa eteni moko to mibale na buku ya Santu Luka, mpo na Maloba moke awa, pe kokokanisa yango elongo ná eloko moko oyo elobamaki, pe nyonso esika moko, ná nzembo oyo eyembamaki. Pe Nkolo ábakisa mapamboli na Ye na litangi ya Luka 19.

Bongo Yesu akotaki pe alekaki na Yeliko.

. . . tala, ezalaki na moto moko na nkombo Zakai, oyo azalaki mokonzi ya bakongoli mpako, pe azalaki na bozwi mingi.

Pe alukaki komona soki Yesu azalaki nani; pe akokaki te mpo na bibele ya bato, . . . azalaki moto mokuse.

Pe apotaki liboso, pe abutaki nzete ya sikomore mpo amona ye: mpo asengelaki koleka na nzela wana.

Pe ntango Yesu akomaki na esika wana, atombolaki miso, pe amonaki ye, pe alobaki . . . Zakai, welisa, . . . kita na nse; mpo lelo esengeli navanda na ndako na yo.

⁷⁰ Esengelaki kozala butu moko ya somo mpenza. Mwa moto moke yango azwaki mpongi ata moke te. Azalaki bobele koningana pe kobaluka-baluka butu mobimba. Biso nyonso toyebi ba-butu ya ndenge wana: ókokoka kopema te, ókokoka kozwa mpongi te. Pe atungisamaki butu mobimba, kobaluka-baluka.

⁷¹ Boyebi, mwasi na ye, Rebeka, azalaki mondimi, pe azalaki kokanisa bolamu ya mobali na ye oyo azalaki na mombongo na Yeliko. Pe na ntembe te, azalaki moko na kati na masanga ebele ya mikolo wana. Pe Rebeka ayebanaki na—na mosakoli moko na nkombo Yesu ya Nazarete, Oyo bazalaki koloba ete azalaki Mwana na Nzambe. Pe azalaki kolinga ete mobali na ye ákutana na Moto yango.

⁷² Mpamba te, ayebaki ete Bayuda bateyamaki, ete: “Soki moto moko azalaki mosakoli, makambo ye akoloba esengeli kosalema. Kasi soki makambo alobaki esalemi te, boye boyoka ye te.” Nzambe atikelaki bango Liloba wana, na nzela na basakoli na Ye. Na lolenge wana nde mosakoli azalaki koyebana.

⁷³ Pe mopesi mibeko monene oyo, Mose, atiká pe mobeko: “Nkolo Nzambe na bino akotelemisa Mosakoli moko lokola ngai. Ekosalema ete moto oyo akoyoka Mosakoli yango te akolongolama na kati na bato.”

⁷⁴ Pe Rebeka andimisamaki solosolo, ntango amonaki Yesu ya Nazarete kotelema pe koyebisa bato makambo oyo ezalaki na mitema na bango, kosakola makambo oyo esengelaki kosalema, pe esalemaki bobele ndenge Alobaki, etikalá kokweya ata mbala moko te. Pe Azalaki mpenza na alimá na Liloba na Nzambe. Ye andimaki yango.

⁷⁵ Kasi Zakai, mobali na ye, asosolaki malamumu te. Pe, ee, bosolo mpenza ya likambo ezalaki nde, atikáláká komona Yesu mokolo moko te.

⁷⁶ Pe ya solo ezali eloko moko mabe, komeka kosambisa moto liboso ya koyoka ye. Bosalaka yango ata moke te. Tokweyaka na likambo yango mbala mingi, lelo oyo. Tokoyoka likambo ya moto, pe, liboso kutu tósolola na ye, to—naino to...tosili komisalela likanisi moko na ntina na ye, longwa na oyo moto mosusu alobi. Pe yango ezali likambo moko malamumu te. Esengeli tókende, tómona biso moko.

⁷⁷ Lokola elobamaká na ntango moko: “Eloko ya malamumu ekoki kobima na Nazarete?”

⁷⁸ Ntango Filipino akendaki kotala Natanaele pe amonaki ye na nse ya nzete, pe alobaki: “Yaka, kotala Nani oyo tokutani na ye, Yesu ya Nazarete, Mwana na Yosefe.”

⁷⁹ Alobaki: “Boye, eloko ya malamumu ekoki kobima na Nazarete?”

⁸⁰ Apesaki ye maloba ya malamumu koleka oyo akokaki kopesa ye. “Yaka, komona.” Kotikalala na ndako te pe kotóngá. Yaka, komona yo moko.

⁸¹ Pe ntango ayaki, Yesu amonaki ye koya. Alobaki: “Tala Moyisalele oyo bokosi ezali kati na ye te.”

⁸² Alobaki: “Rabi,” oyo elingi koloba *molakisi*, “Ntango nini yo oyebaki ngai?”

⁸³ Alobaki: “Liboso Filipino ábenga yo, ntango ozalaki na nse ya nzete, Namonaki yo.”

⁸⁴ Wana ekokaki nango. Alobaki: “Rabi, Ozali Mwana na Nzambe. Ozali Mokonzi ya Yisalaele,” mpamba te amonaki liloba mpenza oyo—oyo Mose alobaká ete ekosalema. Batikalaki kozwa mosakoli te mibu nkama minei, pe tala Moto moko oyo azalaki na alimá mpenza na Liloba.

⁸⁵ Ndenge mpenza mwa elenge mwasi wana na libulu ya mai ya Samalia asengelaki komiyoka ntango abimaki mpo na kotoka mai mokolo moko, pe tala Moto moko, Moyuda, azalaki wana. Amonanaki lokola moto ya mibu ntuku mitano, atako Azalaki bobele na mibu ntuku misato. Mosala na Ye ekomisaki Ye mokóló.

⁸⁶ Ntango bazalaki na elambo ya—ya mingombo, bazalaki kosepela bango nyonso. Pe Yesu agangaki, ndenge etangamaki kala mingi te: “Boya epai na Ngai.” Na sima Abandaki koteya liteya na Ye monene.

⁸⁷ Pe ba—pe Bayuda balobaki na Ye: “Olingi koloba Omoná Abraham? Pe Ozali Moto oyo alekisi naino mibu ntuku mitano te, pe koloba Omoná Abraham? Sikawa toyebi ete Ozali ligboma.” Pe liloba wana *ligboma* elingi koloba “eléma.” “Toyebi ete Ozali elémá. Ozali na molimo mabe.”

⁸⁸ Alobaki: “Liboso Abraham ázala, Nazali.” Wana ezalaki NAZALI oyo asololaki na Mose na nzete oyo ezali kopela moto.

⁸⁹ Pe tomoni ete ntango Avandaki... esengelaki Áleka na Samalia. Mpo, Yisalaele asilaki koyoka nsango, pe Ye azalaki koya sikawa epai na mabota misato: Bayuda, Bai-mabota, pe Basamalia; libota ya Hama, ya Semi, ná ya Yefete. Pe Ye azali... Nsango-malamu esengeli étalisama epai na bango. Pe Akomaki na engumba na nkombo Sukala, pe kuna, avandaki pene na libulu ya mai. Pe Atindaki bayekoli na Ye na engumba, koluka bilei.

⁹⁰ Mwa mwasi moko ayaki. Mbala mosusu, ee, tokoki kobenga ye lelo “molaso,” nkombo moko mabe. Boyebi eloko nalingi koloba. Na bongo amonaki Yesu... Nalingi koloba, ezalaki naino Yesu te oyo ye amonaki kuna, ezalaki bobele Mobali ya Moyuda moko lokola bato nyonso avandi atii mokongo na etutu. Na mwa libulu wana ya mai, na suka ya balabala, ya... esika bato ya engumba bayaka kotoka mai. Mwa Mobali yango avandaki wana, ayebanaki te. Mwasi yango ntango mosusu ayaki pene na ngonga ya zomi na moko ya moi, kotoka mai, mai ya libota mpo na mokolo wana. Pe akitisaki katini mpo na kotoka yango, pe, liboso abanda kobenda yango, ayoki Moto moko koloba: “Pesa Ngai mai.”

⁹¹ Atalaki pe amonaki ete ezalaki Moyuda moko. Pe ekoki kozala ‘te alobaki eloko moko lokola boye: “Misié, na momesano Yo okoki koloba likambo ya boye te. Nazali Mosamalia. Yo

ozali Moyuda. Pe toyokanaka te . . . Awa boye bokabwani ezali. Tozalaka na boyokani ya boye biso ná bino te.”

⁹² Pe Akobaki koloba. Lisolo ekobaki, tééé na likambo ya koyeba soki asambelaka na Yelusaleme. Alobaki: “Biso Bayuda toyebi eloko tosambelaka, mpo lobiko euti na Bayuda.” Pe lisolo ekobaki mpo na na mwa ntango. Pe sima na mwa ntango Alobaki na ye: “Kende kozwa mobali na yo pe bóya awa.”

Alobaki: “Nazali na mobali te.”

⁹³ Alobaki: “Olobi solo, mpamba te osilá kozala na mibali mitano, pe oyo ozali na ye sikawa azali mobali na yo te.”

⁹⁴ Alobaki: “Misié, namoni ete Ozali mosakoli.” Sikawa, bomoni, batikálá kozala lisusu na mosakoli te mibu nkama minei, banda na Malaki. Alobaki: “Namoni ete Ozali mosakoli. Toyebi ete, ntango Masiya akoya, Akolobela biso makambo oyo. Yango nde ekozala elembo ya mosakoli. Ntango Masiya akoya, Akoyebisa biso makambo oyo.”

Yesu alobaki: “Ngai nazali Ye, oyo azali kosolola na yo.”

⁹⁵ Apotaki mbangu na engumba pe alobaki: “Bóya, kotala Moto oyo ayebisi ngai makambo oyo nasalá. Mbala mosusu nde Masiya yango mpenza te?” Ndenge Pole wana epelaki mpenza liboso ya elenge mwasi moko ya lolenge wana!

⁹⁶ Oyo—oyo ezalaki mpenza pamela epai na ba-nganganzambe ya tempelo ya mikolo wana, baoyo bamonaki Ye kosala makambo moko wana, kasi babengaki ye “Bezezebula, molimo mabe, molimo ya mbindo nde ékosáláká misala wana”! Na ntango oyo, Likomi ezalaki kotatola polele ete ekozala Masiya. Sikawa biso . . .

⁹⁷ Rebeka amonaki nyonso wana, pe azalaki komitungisa mpo mobali na ye ákoka kokoma esika oyo Yesu ya Nazaleta azalaki. Pe asosolaki ete esengelaki Ákoma na Yeliko, engumba na ye, mokolo wana. Pe abandaki kobondela mpo na ye. Nákolikya ‘te ba-Rebeka bazali ebele awa na mpokwa oyo, ete bokobondela mpo na mibali na bino, ete na ntango moko boye Yesu álekela nzela na bango. Boye abondelaki butu mobimba, wana tokolobela yango na ndenge ya lisolo.

⁹⁸ Pe boyebi, ntango moto abandi kobondela mpo na yo, na bosòlo mpenza, o—okozanga kimia. Okoki koyeba, eloko moko ezali kosalema.

⁹⁹ Pe boye na ba ntongo, toloba . . . Zakai azalaki na momesano ya kolamuka sima na ngonga, mpo, tokoki koloba, azalaki na restaurant, pe atikelaki . . . moyangeli na ye—na ye ya mosala, pe bamosusu, bándela mombongo yango. Kasi na ntongo wana, alamukaki na ntongo mpenza, amibongisaki malamumu mpenza, pe alataki bilamba na ye ya kitoko koleka. Pe Rebeka, sima na kobondela butu mobimba, pe komona ndenge azangaki kimia . . .

¹⁰⁰ Pe Rebeka, yoka, ntango omoni Zakai na yo akomi lokola ákozanga kimia, mikanisela bobele ete, Nzambe azali koyanola libondeli, omoni. Esalemaka nde bongo. Ntango omoni akomi na lolenge oyo ákokoka kozongisela yo maloba ya malamu te, kobosana te, koba kotingama. Kala mingi te Nzambe akolekela ye na nzela wana.

¹⁰¹ Azangaki mpenza kimia. Na ntango alamukaki, alataki bilamba na ye ya kitoko koleka. Pe nákomona Rebeka kobaluka pe koloba: “Zakai, molongani na ngai, olamuki ntongontongo lelo.”

¹⁰² “Ô, iyo. Ah, nalingaki kaka, ah, ah-ah-ah, hum. Oyebi, na—nakanisaki kaka náxima libanda kozwa mwa mopepe.”

¹⁰³ Kasi, azalaki na makanisi oyo: “Nazokoka kolongola Moto wana na makanisi na ngai te. Boyebi eloko nini nakosala? Nakokende kuna na ekuke yango esika oyo Akokotela. Pe ntango Akokota na ekuke wana, nakoyebisa Ye eloko nini ezali na makanisi na ngai, ndenge mwasi na ngai akomi kokende, na mayangani yango, makambo oyo akomi kosala. Nakoyebisa Ye oyo nákokanisa na ntina na Ye.” Boyebi, na momesano bato bakomaka na makanisi ya ndenge wana, boyebi, kaka mpo na biloba-loba moko boye.

¹⁰⁴ Bongo amibongisaki mpenza. Abimaki malembe. Abwakaki miso na sima, na ndako, komona soki moto azalaki kotala, pe emonanaki lokola moto moko azotala te. Kasi Rebeka azalaki kokengela ye na lidusu ya lininisa, ákomonáká nini azalaki kosala. Pe na esika ábaluka na ngambo ya restaurant na ye, akendaki na ngambo ya Balabala Sembo.

¹⁰⁵ Boyebi, na momesano bokokutana na Yesu na Balabala Sembo. Ya solo. Sembo kati na mombongo na yo! Olingi kokutana na Ye, zala na bosembo, zala na bosolo, zala sembo ná Nzambe pe ná bato, zala sembo ná bazalani na yo.

¹⁰⁶ Boye akamataki balabala yango na ekenge, mpo ayebaki ete esengelaki Ákotela na ekuke songolo. Baumisaki Ye mwa moke na ntongo wana, mpo bakufi miso mibale bazalaki na mposa ya lobiko, ndenge Likomi eyebisi biso, pe Abikisaki bango. Pe ntango akomaki na ekuke yango epai Yesu asengelaki kokotela. . . Boyebi, Biblia elobi: “Ye azalaki moto moko ya mokuse.” Pe ntango akomaki wana, bato mosusu ya mbinga mpenza batelemaki wana, pe akokaki kutu kozwa esika te, mpo ámata pe ámona Ye. Bato bamataki na bitutu pe bisika nyonso.

¹⁰⁷ Boyebi, ezali na eloko moko esalaka, ete, ntango Yesu ayei epai moko, yango ebendaka ntango nionso bokebi ya bato na ndenge moko boye. Bazalaki wana, pene báyemba: “Ozana!” Pe bango. . .

¹⁰⁸ Alobaki: “Sikawa, bakokeba na ngai awa te. Pe nakokoka komona Ye te, mpo mbala mosusu Akotambola na kati-kati ya balabala, ná mokengeli moko, pe nakokoka komona Mobali oyo

te. Kasi nazondima te ete Ye azali mosakoli, mpamba te bateyá ngai ete mikolo ya bisakweli pe ya makamwisi esila koleka.” Boyebi, ntango ebongwani mpenza te, longwa wana.

¹⁰⁹ Soki Nzambe asilá kozala Nzambe, Azali bobele Nzambe. Soki Azali te, boye Azalá pe Nzambe ata mokolo moko te. Okoki koloba te ete Azalaki Nzambe na ntango moko, bongo na sima azali lisusu Nzambe te. Ye akomaka mobange te. Akoki kobongola makanisi na Ye te. Ye asengeli kotelema ngwi na mikano na Ye. Na bongo, bokoki kopema na elikya ete, oyo Ye alobaki, Akosala yango. Ezali oyo . . .

¹¹⁰ “Abraham andimelaki Nzambe, abengaki biloko oyo ekesani na yango lokola ezalaki—ezalaki na yango te. Biloko oyo emonanaki lokola solo, oyo miso na ye ekokaki komona, kasi ekesanaki na Liloba na Nzambe, pe ye—ye mpo . . . asalaka te . . . atalaki ata yango te. Abengaki yango lokola ete ezalaki te. Andimelaki Nzambe.” Atikalá kokangama na yango kaka mpo na mokolo moko te. Akobaki na bomoi bongo, mibu ntuku mibale na mitano, liboso Yisaka ábotama. Pe akobaki kokoma se makasi, ntango nionso

¹¹¹ Biso lelo oyo tozoloba, na ngolu, pe na mawa pe kokamatama na Klisto, ete tokomi Momboto na Abraham, pe tozokoka kotiela Nzambe motema ata ngonga ntuku mibale na minei te. Kasi Momboto na Abraham ya solosolo atelemaka ngwi na Liloba na Nzambe pe eloko moko ekolongola ye na yango te.

¹¹² Nzambe ayebisaki Abraham, ntango akomaki na mibu ntuku nsambo na mitano, pe Sara azalaki na mibu ntuku motoba na mitano, ete bakozwa mwana. Ee, bakendaki koluka ba-pince nyonso ná ba-couche, pe bamilengelaki mpo na yango. Ya solo. Eloko ya kopekisa bango ezalaki te. Bayebaki yango.

¹¹³ Mikolo ntuku mibale na mwambe ya liboso elekaki. Alobaki: “Sara, ozomiyoka ndenge nini?”

“Bokeseni moko te.”

“Nkembo na Nzambe! Ata boni, tokozwa ye.”

“Oyebi yango ndenge nini?”

“Nzambe alobaki bongo. Yango ekati likambo.”

Na sanza elandaki: “Ozomiyoka ndenge nini?”

“Bokeseni moko ezali te.”

¹¹⁴ “Ee, yango ekomi likamwisi ya monene koleka sikawa. Eleki sanza mibale.” Bomoni?

Mibu ntuku mibale na mitano: “Sara, ozali komiyoka ndenge nini?”

“Bokeseni moko te.”

“Nkembo na Nzambe! Ata boni, tokozwa ye. Nzambe alobaki bongo.”

115 Na bongo pe tomibengi Momboto na Abraham. Oyo Nzambe alobi, Nzambe akoki kosala yango, kosala oyo Ye alobaki ete Akosala. Ngai nakokoka kobatela liloba na ngai ntango nyonso te. Yo pe okokoka te. Kasi Ye asengeli kosala yango, mpo na kozala Nzambe.

116 Bongo, tomoni ete mobali oyo andimaki yango te, mwa moto ya mombongo oyo ya engumba Yeliko. Azalaki na mombongo moko monene. Akanisaki azali na ye na likambo te. Bazalaki kosepela na ye na banganzambe pe na sinagoga. Bazalaki kosepela na ye na mangomba, pe na ba-Kiwani, pe—pe bibongiseli ebele ya mikolo wana, tokoki koloba. Kasi, yango elingi koloba te ete ezali Nzambe, ata bongo.

117 Bomengo, etikálá koloba te ete ezali Nzambe, ntango nyonso. Ntango mosusu ezalaka bongo te.

118 Nzambe alobaki: “Ntango ozalaki ya kofanda na elanga,” ayebisaki Yisalaale, kati na makila na ye moko, na ntango wana azalaki na mposa ya kosalela Ye. Kasi ntango amonaki ete akoki, ye akanisaki bongo, boye alingaki lisusu kotambola elongo na Ye te, apesaki Ye mokongo.

119 Yisaya azwaki ndakisa wana epai na mokonzi Uzia, mpamba te Uzia azalaki moto monene na ntango nyonso oyo akobaki komikitisa liboso na Nzambe. Atambusaki makambo na politiki te. Akangamaki na Nzambe, pe Nzambe apambolaki ye. Bokonzi na ye ekokanaki penepene ná oyo ya Solomo. Kasi, ntango akomaki komimona!

120 Yango nde likambo ya kpokoso ná bato lelo. Botika yango ekomela ebongiseli oyo ya bato ya mombongo te, soki te bokosila lokola baoyo mosusu nyonso batikali. Na ntango nyonso oyo bato bakomaka na esika oyo kino—kino bomengo ebandi kozipa bango miso na oyo etali Liloba na Nzambe, bakoti na mikakatano.

121 Uzia azalaki moto monene, kasi amekaki kozwa esika ya motei, mokolo moko, ákota pe átumba paka malasi. Pe nganganzambe mokonzi, na lisanga ya banganzambe mosusu, bayaki koyebisa ye: “Epesameli yo te kosala yango. Ozali mondimi.”

122 Bongo bino bato ya mombongo bobosana yango pe te. Bisobatei tozalaka na mikakatano mingi mpo na kobatela Eloko oyo na molongo. Ezali likambo ya bandimi te. Bandimi bazali na eteni na bango, kasi etumbelo ezali mpo na motei oyo abulisami. “Nzambe atii, na Lingomba, bato mpo na makambo wana.”

123 Na bongo tomoni ete, ata bongo, azwaki etumbelo moke ya mpaka na malasi pe akotaki. Pe Nzambe abetaki ye na maba, pe akufaki na yango. Bomoni, ntango tozomitombola!

124 Zakai azalaki pene-pene na motindo wana. Atondaki na bozwi. Azalaki koyokana malamumu na rabi. Azalaki koyokana

malamu na bato nyonso. Na yango akanisaki, soki mikakatano ekomeli ye, akozwa lisungi, lisanga Sanhedrin ezalaki mpenza sima na ye. Atelemaki na ekuke yango. Sikawa Alingi kosala eloko moko. Akobima kuna pe kokamata Mobali oyo, pe akoyebisa Ye na miso na Ye ete: “Ozali mosakoli ya lokuta. Ozali na eloko moko te. Ozali bobele kotanga makanisi ya bato, pe kopengwisa bato.” Bomoni, atikálá kotelema te mpo na kotanga Liloba.

Wana nde esika libunga ezosalema lelo oyo.

¹²⁵ Soki Yisalaela basalaka yango na esika ya kosala oyo basalaki, balingaki kozala na esika ya malamuru koleka lelo oyo. Kasi esengisamaki na bango kosala bongo. Esengelaki ékokisama, ete miso na bango ézipama, mpo biso tokoka kozwa libaku. Soki ézalaka mpo na wana te, tolingaki kozala wapi? Bótala.

¹²⁶ Kasi ntango akomaki kuna, amoni ete ákokoka komona ata eloko moko te. Azokoka komona ata balabala te, bato ebele mpenza basanganaki wana, bisika nyonso. Boye akanisaki: “Boyebi nini? Azokende . . . Bayebisi ngai, Rebeka ayebisaki ngai ete lelo, Akokende kolia epai na—na Lavinski.” Nákolikya Lavinski moko azali awa te. Kasi, na restaurant na ye, oyo ya mowelani na ye. Ah-ha. Boye ntango mosusu, Akokende kolia na restaurant na ye. “Bongo nayebi ete, mpo na kokóma kuna, ekosengela tókita kuna, tóbaluka na Balabala Sembo awa, tozwi Aveni Aleluya,” tokobenga yango bongo.

¹²⁷ Ba-nkombo wana ezali ya ndenge, kasi nasali bongo kaka mpo na kobeta lisolo na ngai. “Pe ekosengela tobaluka awa na coin oyo, kolongwa na Balabala Sembo, kino na Aveni Aleluya.” Koba kaka na balabala wana mwa ntango molaí, pe okokoma na Aveni Aleluya. Tikálá kaka sémba.

¹²⁸ Boye akiti kuna, noki-noki. Alobaki: “Ngai nazali mokuse.” Abongisaki mwa nzoto na ye: abendaki mandefu na ye; atalaki soki malasi esimbaki ye na nzoto malamuru; manzaka na ye ekatami malamuru. Atelemaki na coin, alobaki: “Nakomona Ye ntango Akoleka awa, pe nakoyebisa Ye oyo ngai nazokanisela Ye ntango Akoleka awa.” Na yango atelemaki na coin.

¹²⁹ Pe abandaki kokanisa: “Boyebi nini? Bobele lisanga moko ya bato yango nde bakolanda Ye. Bakozala awa, pe bako . . . Nazali mpenza mokuse, nakokoka komona Ye ata moke te, boye nakosala eloko moko te na kotelemáká awa. Kozala awa eleki malamuru ndenge nazalaki kuna te. Pe, boyebi, bondimi eloko—eloko nakosala? Nzete ya sikomora moko yango oyo awa, bongo nabanzi nakomata kaka likolo na nzete ya sikomora oyo. Pe boye nde nakokoka komona Ye, pe nakotala Ye malamuru ntango Akoleka boye. Boye Ye akomona ngai kuna likolo na nzete wana te. Pe ezali na etapi moko oyo ebimá kuna; pe nakovanda bobele likolo na etapi wana pe nakotala Ye malamuru ntango Akomonana,

pe ntango Akolimwa na miso na ngai. Nakozwa nzela ya komona Mobali yango malamumu.”

¹³⁰ Bongo, eloko ya liboso, boyebi, abandaki kotala bosanda ya etapi yango, pe ezalaki mwa mosika ná ye.

¹³¹ Boyebi, solo mpenza, etapi ya liboso ezali mwa mosika na biso. Esengeli tóyamba yango na kondima. Iyo. Eleki mwa moke oyo mayele ya moto ekoki kolimbola. Okoki kolimbola Nzambe te. Soki osali yango, wana Ayambami lisusu na kondima te. Osengeli nde kondimela Ye. “Ye oyo akoya epai na Nzambe asengeli kondima ete Ye azali, pe azali Mofuti na baoyo balukaka Ye na mpiko.”

¹³² Boye tomoni mwa moto ya lukumu oyo, moko na bato ya mombongo ya engumba yango, alobaki: “Sikawa, nakomata ndenge nini?” Pe ntango mosusu molokoti ya fúlu alekaki naino te na ntongo yango, pe mwa bingóngóló ya fúlu mosusu ezalaki na coin, etondá na—na misuni ya kopola na engumba. Bongo bango. . . Alobaki: “Soki nakokoka kosimba góngóló ya fúlu wana, nakomata pe nakosimba etapi yango.”

¹³³ Kokamwa, ndenge Nzambe amemaka bato básala makambo lokola ya mpámبالámpambala. Bongo, kasi boyebi, soki okani mpenza, olingi komona Yesu, okosala makambo lokola ya mpámبالámpambala, soki okani mpenza ete olingi bongo; ozali—ozali mpenza solo na motema, nde olingi mpenza koyeba ntina ya makambo Yango nyonso.

¹³⁴ Pe oyo wana ezalaki makanisi na Zakai. Alingaki koyeba ntina ya makambo nyonso oyo, ye azalaki koyoka. Boye alobaki: “Moto moko azali na nzínganzíngá te, boye nakokóta na mayele pe nakozwa góngóló ya fúlu wana pe nakobenda yango awa, pe nakopusana na—na nzete oyo awa. Na bongo nákokoka komata na etapi ya liboso, pe nazala likolo na—likolo na balabala ntango Akoleka boye.” Kasi ntango abandaki kobenda ngóngóló yango, ezalaki kilo mingi mpo na ye kobenda yango. Azalaki moto ya mokuse, muke na nzoto. Boye, eloko se moko ya kosala ezalaki, amema yango. Kasi, alataki bilamba na ye ya kitoko.

¹³⁵ Bomoni ndenge zabolo asalaka? Akomeka kotia makambo ya ndenge nyonso na nzela na yo. Na yango ye—akobwaka biloko nyonso, ntembe nyonso, mabe nyonso oyo akoki, mpo na kopekisa yo ómona Bosolo te. Ayebi kosala yango malamumu.

¹³⁶ “Boye ngai nalati bilamba na ngai oyo ya kitoko koleka,” akokaki pe koloba: “Pe awa boye, na—na, soki namemi ngóngóló ya fúlu oyo, nakokoma bosoto.”

¹³⁷ Boyebi, ezali na bato mosusu oyo bakanisaka, koya kovanda na liyangani lokola oyo ekoki kokomisa yo mwa bosoto, na miso na bato minene pe ya lokumu ya engumba yango. Kasi soki okani mpenza komona Yesu, okoya, ata bongo. Ya solo. Boye, eloko ya kosala ezali bobele moko, soki moto akani mpenza kamona Klisto, eloko ya kopekisa ye ezali te.

¹³⁸ Na yango agumbamaki pe asimbaki ngóngóló ya fúlu wana, pe ye wana ayei. Bobele ntango oyo asimbi yango malamú, na maboko na ye, bawelani na ye, mibale to misato na kati na bango, babimeli na coin. Balobaki: “Ee, tala Zakai. Azwi mosala mosusu. Sikawa akomi kosala mpo na engumba.” Nabanzi ndenge mwa miso etelaki ye mpenza.

¹³⁹ Nazomituna, na mpokwa oyo, soki mokonzi akoti pe amoni bato ya mombongo na kati na bino awa, bovandi na liyangani moko lokola oyo, oyo babengi “batuntuki,” nazomituna soki miso na bino. . . Ee, basili koyeba bino, boye ekozala malamú bovanda se kimia na ngonga oyo. Zakai asilaki kozwa yango na maboko; asilaki komilakisa. Pe bosili kokota awa, boye ekozala malamú bovanda bobele kimia, bókoba na yango, wana bovandi awa.

¹⁴⁰ Asimbaki ngóngóló ya fúlu yango na loboko na ye. Oyo nde likambo ya kosala mpo na moto ya mombongo! Ye wana ayei, miso eteli ye. Pe bango bazalaki koloba: “Ee, oyebi nini, Zakai?” Boyebi, ayaki kososola ete, mowelano ya mombongo ezalaki matata mpenza. Balobaki: “Ye oyo. Sikawa akomi kosala mpo na engumba. Nayebi, nayebi ete mombongo na ye ezotambola malamú te, tala motindo ya mosala oyo azwi.”

¹⁴¹ Akanaki mpenza komona Yesu, ata ndenge nini. Ayokaki nsango na yango, pe alingaki koyeba yango ye moko.

¹⁴² Nakosepela ete Nzambe ásala ete moto nyonso awa ázwa ezalela wana. Soki oyoká nsango na Ye, luka óyeba. Akufi te. Azali na bomoi awa na mpokwa oyo, kaka ndenge Azalaki na mabongo ya Galilai. “Tala, Nazali na bino ntango nyonso, ata kino na suka ya mokili. Misala oyo Nazosala, bino pe bokosala yango.” Soki ezali bongo te, boye Azalaki Masiya ya lokuta; Azalaki te ma—Masiya oyo Ye asengelaki kozala. Kasi soki Azali mpenza kosimba makasi pe kobatela elaka na Ye, Azali se Nzambe oyo azali komimonisa Ye moko epai na bato. Ekosengela Ásala makambo ndenge moko na oyo Asalaki. Wana nde lolenge na Ye ya kosala makambo. Ekosengela na Ye moko komilakisa lolenge oyo Asalaki na ntango wana. Na Baebele 13:8, Paulo kolobáká na Bayuda, alobaki: “Yesu Klisto azali ndenge moko lobi, lelo, pe libela.” Na yango, Asengeli kozala ndenge moko na malako, ndenge moko na nguya, ndenge moko na makambo nyonso oyo Ye azalaki. Asengeli kozala ndenge moko lelo.

¹⁴³ Ntango mosusu, tomonaka misala na Nzambe, nayebi ete bokosi esangani ná yango. Ntango okuti dollar ya lokuta, elobelaka bino nini, bino bato ya mombongo? Okotika? Okobimisa mbongo nyonso na banki pe okobwaka yango na—na ebale mpo okuti dollar ya lokuta? Dollar ya lokuta wana ezotalisa bobele ete ezali na dollar ya solo oyo bamekoli yango. Pe Pentekote etondi na komekola ya mosuni. Kasi yango elingi koloba nini? Ya malamú ezali na esika moko boye. Ezali nde moto

moko azomekola eloko moko oyo moto mosusu azali na yango solo. Ezali bobele ndenge ya kozwela lipa. Ezali nde Eloko moko ya solo-solo, sima na eloko yango, oyo moto moko azali komeka komekola.

¹⁴⁴ Boye tomoni, Zakai asimbi ngóngóló na ye ya fúlu. Pe bawelani na ye bazokita balabala, bazosekáká ye. Kasi yango esalaki bokeseni moko te. Akanaki mpenza ámona Yesu. Bongo nde akoyeba malamú oyo Ye azali.

¹⁴⁵ Tokokaki pe komiyoka bobele ndenge wana kati na biso, soki tokokaki bobele kozwa mokano bongo, ete toluka koyeba ntina ya Oyo nyonso, soki ezali Bosolo. “Soki Nzambe azali Nzambe, salela Ye.” Mosakoli Eliya alobaki bongo, likolo na Ngomba na Kalemele. “Soki Nzambe azali Nzambe, bósalela Ye. Soki ye Bala azali Nzambe, bósalela ye.” Soki Yesu Klisto Ye moko akoki komitatola ete Azali ndenge moko lokola Azalaka te, boye Asekwaki na bakufi te.

¹⁴⁶ Soki tokomeka bobele kokotisa bato na nzela na mayele ya psikologi, soki tokoki kaka kobongola bango bálóngwa ba-Methodiste bákoma ba-Baptiste, to ba-Baptiste bákoma ba-Pentekotiste, wana ezali nini? Ezali makambo ya psikologi. Ya solo.

¹⁴⁷ Nzambe na bomoi Oyo akelaki likolo pe mokili azali kaka Mokeli moko yango. Azali kaka Nzambe moko yango, na malako, lokola Azalaká. Nazali na esengo namonaki Nzambe liboso ete lingomba ékanga ngai, koyeba ete Ye azalaki.

¹⁴⁸ Namonaka kowelana, na koswana, pe komilelalela na bango. Ezalaka bobele bongo, ntango nyonso. Bazálá na makambo ya ndenge moko, leká kati na Makomi.

¹⁴⁹ Kasi mwa mobali oyo alingaki komona Yesu, pe akanaki mpenza kosala yango. Azalaki moto ya mombongo, pe alingaki kosala likambo ya malamú. Na yango, ye, ntango asilaki kokana...Mwasi na ye na ndako, azalaki kobondela, pe mabondeli ya Rebeka ezalaki kolanda ye. Pe esengelaki na mwa mobali yango ámata na nzete. Esengelaki ábuta na . . .

¹⁵⁰ Nalingaki koloba bongo te. Oyo wana nde elobeli ya sudi, ya “kobuta.” Bato boni bayebi “kobuta nzete?” Ee, boye, boni kati na bino baí-Kentucky bozwami na esika oyo?

¹⁵¹ Esengelaki na ye kobuta nzete yango, komata na nzete. Pe tala ye oyo, avandi kuna likolo na nzete, azopangusa bosoto na elamba na ye ya sika; azolongola biteni ya matiti na mabolongo pe na maboko na ye, epai oyo amatelaki nzete. Kasi oyo ekomaki etali ye te, ye akanaki komona Yesu. Pe soki yo ozali mpenza . . .

¹⁵² Boyoka ngai. Soki okamati mpenza mokano ya komona Ye, okomitungisa te na ntina na oyo esengeli óleka na yango, matongi boni, oyo bato mosusu bakoloba. Yo olingi na yo komona

Yesu, okosala nyonso mpo ómona Ye. Okozela ngala na yo. Okosala nyonso oyo okoki kosala, bobele mpo ókoka komona Ye.

¹⁵³ Kpokoso lelo oyo, ezali ete, bato bazali na mposa makasi te. Bato bazali na mposa pe nzala makasi te. Nabanzi lingomba esengelaki kozala na mwa mungwa koleka ndenge yango ezali.

¹⁵⁴ Mungwa epesaka mposa. Mungwa ezali elengi soki omeki yango. “Kasi soki mungwa ebungisi elengi na yango, ekosunga na eloko moko te,” ekómi bobele ebongiseli. Ya solo. Kasi esengeli ezala na elengi na yango. Mungwa ezalaka na elengi, bokasi.

¹⁵⁵ Soki moto amoni Klisto kobika kati na yo, ekopesa ye mposa ya kozala lokola yo. Ekosala ete ámona Yesu kati na yo, ekosala ete ámona Nzambe.

¹⁵⁶ Ndenge nini bayebaki ete Mose azalaki ya Nzambe? [Eteni ya bande oyo ezangi maloba—N.D.E.] Pe bayebaki ete Nzambe azalaki ná ye.

¹⁵⁷ Sikawa tomoni, lokola Petelo alobaki na Mokolo ya Pentekote, ete: “Bino bato ya Yisalaele, ndenge nini bino...” Akweisaki libota wana mpo babakaki Mwana na Nzambe na ekulusu. Alobaki: “Bino . . . Yesu na Nazarete, Moto oyo Nzambe andimisaki na kati na bino, atatolamaki na Nzambe, na bilembo pe bikamwa oyo Nzambe asalaki na nzela na Ye; bomemaki Mokonzi na Bomoi, na maboko ya bato mabe, pe bobákaki Ye na ekulusu.”

¹⁵⁸ Nikodeme atalisaki mposa na bango nyonso malamumu te? Ezalaki lokumu na miso ya bato kozala moto moziki na ekolo moko boye, yango ezalaki kopekisa bango komona Yesu. Alobaki na Ye: “Rabi, toyebi ete Ozali Motei, oyo auti na Nzambe, mpamba te moto moko akoki kosala bilembo oyo te soki Nzambe azali elongo na ye te.” Bayebaki yango. Kasi mpo na lokumu na miso ya bato, bazalaki na nsoni ya kondima yango.

¹⁵⁹ Ebongaki kutu bázala lokola mokufi miso oyo Yesu abikisaki.

Balobaki: “Moto wana azali mosumuki.”

¹⁶⁰ Alobaki: “Ezali likambo moko ndenge. Bino, nde bakambi ya lelo, pe boyebi esika Moto oyo auti te?” Alobaki: “Soki Azali mosumuki to te, nayebi te. Kasi eloko moko oyo ngai nayebi: ezali ete nazalaki mokufi miso, sikawa nakomi komona.” Yango wana. Wana nde eloko moko oyo ye ayebaki mpenza.

¹⁶¹ Nasepelaka na litatoli ya solo ya bato oyo batelemaka na kati na bato pe balobaka: “Nayebi ete eloko moko ezali. Eloko moko ekomeli ngai.”

¹⁶² Ndenge namekaki koloba na ntina na ndeko mwasi ya moindo: “Nazali oyo nalingi kozala te, to oyo nasengelaki kozala te, kasi nzokande nayebi ete nazali lisusu ndenge nazalaki te.” Eloko moko esimbaki ye.

163 Zakai, avandi kuna likolo, azalaki kati na mikakatano mpenza, avandi kuna likolo. Pe boyebi. . .

164 Boyoka ngai. Bato oyo bandimaka Nzambe, bakotaka kati na mikakatano, ata ndenge nini. Basalaka makambo oyo ezali mpenza kotelemela etambolela ya mokolo yango.

165 Bóyoka Mose. Mokolo moko, mobateli mpate. Mobundi monene na Ezipito, mpo na kokangola bato na ye, kasi akokaki te. Bongo akomaki mobateli mpate, mibu ntuku minei. Mobange moko malamumu, afandisaki makambo, moto malamumu, akomaki na mwasi ná mwana; Sefora, Gershom. Sika tomoni ete, sima na Nzambe kokutana na ye, pe amonaki Nzambe na nzete oyo ezalaki kopela moto, mokolo oyo elandaki afandisaki mwasi na ye likolo na mpunda, mwana na loketo. Mandefu ya pembe ezopepa na mopepe. Na nzete moko ya kogumbama na loboko, azokamba mpunda wana; mopepe ezopepa. Libandi na ye ékongenga, na nse ya moi makasi wana, ákokendáká na Ezipito.

Moto moko akokaki koloba: “Mose, ozosala nini?”

166 “Nazokita na Ezipito, kozwa bokonzi.” Bokamati mboka ya moto moko, kasi asalaki yango. Mpo na nini? Nzambe ayebisaki ye asala yango. Nde ntina na yango. Bomoni, emonanaki— emonanaki ligbóma. Nzokande, ye mobali yango akimáká esika yango, sikawa azozonga kuna mbala moko.

167 Wana nde lolenge ya bato oyo bakutanaka na Nzambe, oyo bakani komona Ye.

168 Tala ye oyo avandi. Sima na mwa ntango, abandi kokanisa: “Oyebi, Rebeka ayebisaki ngai ete Mobali oyo azali Mosakoli. Nazali na ntembe mpenza na ntina na yango. Nazondima yango te. Nazondima te ete basakoli bazali na mikolo oyo. Soki ezalaki bongo, mbele nganganzambe na ngai alingaki koyebisa ngai yango. Nganganzambe na ngai azali moko na basali na Nzambe, boye alingaki koyebisa ngai yango.” Ezali malamumu.

169 Kasi, bótala, mokolo moko te ebongiseli ya mangomba ya mokili etikálá koyamba motindami oyo auti na Nzambe na ntango moko boye, etikálá kosalemá te. Yesu alobelaki bango te ‘te: “Bino Bafalisai bakufi miso, bobongisaka malita ya basakoli, pe bozali baoyo baktisá bango kuna na kati. Nani kati na basakoli Tata atindá, oyo bobomá pe bokotisá ye na lilita te, mpo azalaki kotalisa boyei ya Ye Moyengebeni.” Bomoni?

170 Wana, bongo, tala tomoni ye awa, avandi kuna likolo. Boyebi nini? Nazolikya ete lisolo oyo ezomonana pámbálápambala te, kasi nakokanisa ete alobaki: “Sikawa, zela mwa moke, bongo soki Mobali wana amoni ngai navandi awa, likolo na etapi oyo!” Pe avandaki esika bitapi mibale ekutanaki. Pe avandaki kuna, kokanisáká na ntina na likambo yango.

171 Wana nde esika malamumu ya kovanda, esika banzela na yo pe oyo ya Nzambe ekutani. Wana nde esika malamumu ya kokanisa

na ntina na yango. Pe nazulikya ete moto nyonso na kati awa, oyo akutáná naino na Ye te, pe oyebi solo ete obotami mbala ya mibale na Molimo na Nzambe, ovandi na etapi wana na mpokwa oyo. Kasi, bino bato ya mombongo, nazulikya ete bovandi na esika oyo tozomeka koloba Zakai avandaki, likolo na nzete ya sikomore, na esika oyo bitapi mibale ekutani, oyo ya yo ná oyo ya Nzambe.

¹⁷² Pe alobaki: “Boyebi eloko nandimi ete nakosala? Nakobenda nkasa oyo awa pe nakomibomba.” Amizingaki nzoto mobimba. Amitikelaki mwa lininisa mpo átalela na yango, boyebi, lokasa moko, akokaki kobenda yango na mwa nse, pe koloba: “Nakomona Ye ntango Akoya, kasi Ye akomona ngai te. Akoyeba te ete nazali awa likolo.”

¹⁷³ Bongo ntango avandaki wana, sima na mwa ntango, na kokanisáká likambo yango, makelele moko eyokanaki kuna na coin.

¹⁷⁴ Ezali likambo moko ndenge, kasi, bisika nyonso Nzambe azalaka, emonanaka ete makelele ezali mingi. Ezalaka ndenge, kasi ezalaka nde bongo.

¹⁷⁵ Boyebi, Yisaya, na kati na tempelo, sima na liwa na Ojiya, azalaki kuna. Pe ayokaki makelele moko, pe tempelo mobimba ezalaki koningana. Makonzi elongwaki na bisika na yango. Pe Banje bazalaki wana, Baserafa, wana, baoyo bazali Bakeluba, batumbi na mbeka, mpo na kopesa babongoli motema nzela na etumbelo. Bikelamo Minene wana, koleka Banje, na mapapu na Bango likolo na bilongi na Bango, pe mapapu likolo na makolo na Bango, pe bazopumbwa na mapapu mibale, kogangáká: “Bulee, bulee, bulee, Nkolo Nzambe na Nguya nyonso.”

¹⁷⁶ Soki Mwanje azozipa elongi na Ye mosantu, mpo na kokutana na Nzambe, boni boni biso tokoki kozwa endimeli mpo na kozipa oyo ya biso? Ekosenga tozwa nde Makila na Yesu Klisto mpo na komizipa, bongo nde tokozala bana. Ezali eloko moko ya mikolo oyo *boye*, to eloko moko ya mikolo oyo *kuna* te, kasi Makila nde. Nzambe azalaka ntango nyonso na . . . Esika na Ye se moko ya kokutanaka na moto mpo na kozala na boyokani, ezali na nse ya Makila oyo esopanaki, esika momboto ya Bomoi . . .

¹⁷⁷ Na mbeka ya kala na nse na—na mobeko ya Mose, bazalaki komema nyama. Pe ntango bazalaki kotangisa makila na nyama oyo, mwana mpate, mosambeli azalaki kosambela. Kasi bomoi oyo ezalaki na kati na nyama wana ekokaki kozonga likolo na mosambeli te, mpo ezalaki bomoi na nyama oyo ezangi elimo. Pe yango ekokaki kozonga likolo na mosambeli te. Yango wana ezalaki bobele ko—kozipama. Ezalaki bobele esika moko oyo ezalaki koumela mpo na mwa ntango moko boye.

¹⁷⁸ Kasi na sima ntango misisa ya Emanuele ekatanaki, Yesu azalaki Moyuda te Moi-mabota pe te. Bomoni? Nzoto ya mobali

ebimisaka momboto na nzela na makila, pe limoi ya makila eutaka na mobali. Mwasi . . .

179 Pe bino bato ya Katoliko, ezali mpo na kozanga koyokana na bino te, kasi bobengaka ye: “Maria, Mama na Nzambe,” ndenge nini Nzambe akoki kozala na mama? Ye azalaki na ye ebombelo.

Bokoloba: “Ee, ma—líki eutaka epai na mwasi.”

180 Kasi líki eutaki epai na Maria te. Soki líki eutaka epai na Maria, boye koyoka nsai na nzoto esengelaki kozala. Bótala esika bozotia Nzambe. Nzambe azalisaki nyonso mibale ná líki ná limoi ya makila.

181 Azalaki Moyuda te Moi-mabota pe te. Azalaki Nzambe, eloko moko na nse te. Azalaki Nzambe, oyo amonisamaki polele na mosuni. Ye alobaki te ete, totangaka na Makomi, ete: “Nzambe azalaki na kati na Klisto, kosangisa mokili elongo na Ye moko”? Azalaki Emanuele. Alobaki: “Epai na Ngai, nani . . .”

182 Alobaki kutu na Makomi, awa: “Nani akoki kokweisa Ngai na lisumu? Esika nini Nazangi kokokisa sikisiki oyo ekomamaki mpo na Ngai? Boluka-luka na Makomi. Bozolikia ete bozwi Bomoi ya Seko, na koluka-luka na kati na Yango, nzokande Yango Ezotatola na ntina na Ngai. Pe soki Nazosala misala ya Tata na Ngai te, bongo bondima Ngai te. Kasi soki Nazosala misala yango, ata soki bokoki kondima Ngai te, bondima misala oyo Nazosala, mpamba te yango ezotatola Oyo Ngai nazali.”

183 Ô, lelo oyo Moklisto akomi kozanga, litomba oyo Nzambe apesi ye, pe ya makambo oyo ezali na Biblia! Nakosepela kozwa litangi kouta na yango! Ngonga ekopesamela yango te.

184 Ayokaki makelele yango. Atelemaki. Alobaki: “Ee, oyo ekoki kozala batuntuki na bulee wana bazoya.” Akitisaki lokasa yango, azelaki mwa moke. Sima na mwa ntango, amonaki, bakomi pembeni na coin.

185 Ekokaki kozala ete mbinga mobali moko, ya engambe azalaki liboso. Nakoki komona ye, mobali moko ya molai, mbinga, mapeka semba, ya mibu soko ntuku motoba na mitano, azotambola, lingenda na loboko. Ekokaki mpenza kozala ye oyo tobengaka ye, Ye abengaki ye: “Simona,” pe Apesaki ye nkombo mosusu *Petelo*, oyo elingi koloba “koyambola,” to “libanga ya moke.”

186 Na sima, bato zomi na mibale zingazinga na Ye. Bato bazalaki koya mbangu, mpo basimba ra—Rabi wana Azalaki koleka. Nakoki koyoka bango koloba: “Bosimba Rabi te. Alembi. Ateyaki butu mobimba. Nguya ebimi na Ye. Mongongo na Ye ekauki, kouta na koloba. Bosimba Nkolo na biso te. Asengeli kokende kuna sikawa. Esengeli na Ye kolia. Ngonga na Ye ya kolia ekoki. Nasengi ete bosimba Ye te. Soki bokolinga, nasengi, bopusana pembeni, botika Rabi aleka.”

¹⁸⁷ Ye wana Atelemi. Pe ntango Zakai, mwa moto na biso ya mombongo na Yeliko, ntango abwakaki miso mbala ya liboso epai na Yesu, Akesanaki na bato nyonso oyo ye asilá komona.

¹⁸⁸ Tika tobakisa mwa eloko moko awa. Ntango mosusu mwasi moko ayaki wana elongo na mwa mwana na ye. Zakai atalaki na ngambo *oyo*, mpo atala soki ezali nani. “Ó, nakanisi lisusu ntango monganga azalaki na ndako mokolo mosusu wana. Nazalaki ya kotelama wana na ntango nganzambe azalaki ya kotelema wana, pe. Monganga alobi: ‘Mwana oyo akoki kobika te. Botia ye na chambre pe bokanga bikuke nyonso. Mopepe ekota te.’ Bongo tala libota ya bilanda-landa oyo bayokaki nsango ya Mobali ya lokuta oyo, oyo Azomibenga Mosakoli na Galilai. Bayei awa, pe bamemi mwana yango, ee, oyo, mobeko ya engumba esengelaki ekangisa Ye. Nakotala likambo yango, ntango tokokutana, na likita. Tokoyeba soki tokoki kotala likambo ya moto, oyo akolanda elanda-landa ya ndenge wana. Motó na ye ezali kosala malamumu te.”

¹⁸⁹ Pe nazomona mobali yango koya mbangu pe koloba: “Nazali na mwana moko azali kobunda na liwa, misié. Bokoki kolinga Mosakoli asimba ye? Nandimi ete Ye azali Mosakoli na Nzambe. Nasilá komona Ye na mayangani mosusu, pe nayokaki nsango na Ye, pe nayebi yango.”

“Te. Nakoki te. Bato baleki ebele.”

¹⁹⁰ Kasi, sima na mwa ntango, mwa mwasi moko ayaki, na mwana yango na maboko, pe mwana yango azalaki na bomoi te. “Bótika Asimba ye kaka. Nde nyonso oyo nalingi. Nandimeli Ye. Nandimi ete soki Asimbi kaka mwana na ngai!”

¹⁹¹ “Madame, tokoki kosala yango te.” Ye azalaki mosika na bango, kasi, Atelemaki mbala moko.

Na boye nakoki komona Zakai kobenda lokasa na ye sima pe kotala malamumu.

Alobaki: “Bómema mwana yango awa.”

¹⁹² Ntango bamemaki mwana yango wana, mwa nzoto moke, ékotoka, móto mpenza. Balongolaki bolangiti. Atii misapi na Ye likolo na ye. Mama na ye azalaki wana, na mwa miso na ye kitoko ya Moyuda. Mpisoli ezokita na matama na ye. Tata na ye pe ateleme wana, atomboli maboko likolo, na kondima. Pe Atiaki misapi na Ye likolo na mwana yango, pe fievre etikaki ye. Mwa mwana yango aponyoki na maboko ya mama na ye mbala moko pe akamati nzela na balabala.

¹⁹³ Zakai abongolaki makanisi na ye. “Mobali oyo akoki kozala na eloko moko ya solo. Kasi, malamumu názala na ekenge. Malamumu nátika lokasa na ngai na nse, mpo Ámona ngai te. Akoyela na nzela oyo.”

¹⁹⁴ Okoki kotala Yesu Klisto na bosolo nionso te bongo ótikala kaka ndenge ozalaka. Ezali na eloko moko ná Ye oyo ekesani na

bato mosusu nyonso. Ntango oyoki Ye koloba, okokoma lokola basoda ya Roma: “Moto naino alobá ndenge oyo te.”

¹⁹⁵ Banganganzambe balobaki eloko mosusu. Moto azalaka bobele lolenge moko. Tozomona yango lelo. Moto azali ntango nyonso kokumisa Nzambe mpo na makambo oyo Ye asilá kosala, pe azali kotalela makambo oyo Ye akosala, kasi azali kokeba na oyo Ye azali kosala te. Wana nde lolenge ya moto. Ezalaka na yango ntango nyonso lolenge wana

¹⁹⁶ Kasi soki moto atali, Yesu Klisto, akotikaláká kozala ndenge moko te, akoki komana Ye komimonisa polele.

¹⁹⁷ Yango nde ntina, na ntango otiami elembo ya Molimo Mosantu, elembo yango ezwaka ngambo nyonso mibale ya nkasa, na boyei pe na bozongi. Bakoki komona etamboli, elobeli, Bomoi na Klisto kotalisama na kati na yango, na kati na bato na Ye. Yango nde ezalaki ntina ya liwa na Ye, ete Lingomba ékoka kokóba na mosala na Ye. Kasi biso tomikotisi na makambo ya ndenge na ndenge.

¹⁹⁸ Sikawa tomoni, wana ebandaki Ye kotambola, kokita na balabala. Zakai atomboli nkasa na ye mwa likolo, alingi amona Ye malamumu mpenza wana Ákoleka. Sikawa amizipi mobimba, amibombi malamumu mpenza. Sima na mwa ntango, esengelaki átelema *boye*, mpo átala. Yesu azalaki koya bobele na nse na ye.

¹⁹⁹ Bobele na ntango Akomaki wana, Yesu atelemaki, atombolaki miso, alobaki: “Zakai, sala noki. Kita na nse na nzete. Nakozonga ndako elongo na yo mpo tolia bilei ya mpokwa lelo.” Oyo nde bokeseni! Ayebaki ete wana ezalaki Mosakoli moko oyo Nkolo Nzambe atelemisaki. Ayebaki kaka te azali kati na nzete, kasi ayebaki pe nkombo na ye.

²⁰⁰ Biblia elobi: “Liloba na Nzambe ezali na mopotu koleka mopanga ya mino mibale, ekotaka kino na kati, kokabola mikuwa pe mafuta na yango, pe Esosoli ya makanisi pe mikano na motema.” “Na ebandeli Liloba azalaki, pe Liloba azalaki elongo na Nzambe, pe Liloba azalaki Nzambe. Pe Liloba akomaki mosuni pe avandaki elongo na bango. Pe tomonaki Ye, lokola mwana na Tata ya Likinda.”

²⁰¹ Tala ye wana, Liloba na Nzambe, amimonisaki epai na Zakai oyo. Akitaki, noki-noki, na nse na nzete, mpo ábongola motema.

²⁰² Zakai, yo moto ya mombongo na mpokwa oyo, kanisa, okoki kobombana na nse na nkasa ya nzete ya mosuke te. Ayebi malamumu mpenza esika oyo ozali. Ayebi yo. Ayebi nani yo ozali. Ayebi nkombo na yo. Ayebi ntina nini oyei awa. Ayebi nyonso wana. Ya solo.

²⁰³ Pe biso baoyo tokutani na Ye, pe toyebi Ye, pe tokomi bayekoli na Ye, toyebi oyo Ye azali pe oyo Ye asalaka mpo na bato. Toyebi ete Azali bobele ndenge moko.

204 Zakai kita na nse, na lolenge ya kobongola motema. Alobaki: “Soki...Nkolo, soki nabubaki moto, nakozongisa yango. Nakozwa mbongo na ngai; nakopesa babola.” Bomoni, asilaki kozwa Linyaka wana ya motuya monene. Azwaki eloko moko oyo elekaki mombongo na ye. Azwaki eloko moko, Eloko oyo wana.

205 Pe moto nyonso alukaka ásala eloko moko boye. Kasi soki ozangi Bomoi na Seko, nyonso oyo osalá ekosunga yo na nini? Nkita monene oyo moto akoki kozwa ezali kozwa bonsomi.

206 Ndenge nalobaki, na Kondimana na Kala, ntango limoi ya makila na mpate ezalaki kosopana, ekokaki kozonga likolo na mosambeli te, yango wana azalaki kozonga bobele ná mposa moko wana ya kosala masumu. Kasi na likambo oyo, ntango totandi maboko, na kondima, likolo na limoi na Makila oyo ebukanaki na Kalvari; ya Moyuda te, ezalaki pe limoi ya moi-Mabota te. Ezalaki nde Makila na Nzambe, na bongo Bomoi oyo ebimi kuna ezongisi Bomoi na Nzambe epai na biso, yango nde Bomoi na Seko. Liloba ya Greki oyo basaleli wana, Zoe, oyo elingi koloba: “Bomoi na Nzambe Ye moko,” pe Bomoi yango mpenza oyo ezalaki kati na Klisto, nde ezalaki Nzambe.

207 Nzoto yango ezalaki ya Moto, ya solo. Kasi Nzambe, Mokeli, Oyo akelaki moto ya liboso! Autaki wapi soki Ye akelaki ye te? Nzambe, Mokeli, Akelaki Adama, na lisungi ya eloko moko te. Nzambe, Mokeli, akelaki Moto yango, Klisto Yesu, Mwana na Ye, na libumu ya Maria. Pe Ye azalaki Emanuele. Pe ntango lisumu... .

208 Ezalaki te mpo esengelaki Ákufa; Andimaki yango. Kasi mpo lisumu ebetaki, likonga oyo etubaki motema na Ye, bongo eloko moko esalamaki. Bomoi ezongaki likolo na mosambeli. Boye yango ezali nini? “Bongo tozali lisusu na makanisi ya lisumu te,” elobá mokomi ya Baebele. “Mposa ya masumu elongwe.” Bongo, sikawa tokomi bansomi.

209 Zakai; ntango bamonaki Yesu komata na Gologota, mpo na kobakama na ekulusu.

210 Na ntembe te ete zabolo azalaki ntango nionso kobetela Ye ntembe. Zabolo abetelaki Ye ntembe ntango amonaki Ye mbala ya liboso, ntango Akendaki na lisobe, sima na Molimo Mosantu kokitela Ye. Alobaki: “Soki Ozali Mwana na Nzambe, lakisa biso likamwisi. Bongola mabanga oyo mapa.” Zabolo wana akufi naino te. “Lakisa ngai likamwisi.”

Yesu alobaki: “Ekomami, ete, ‘Moto akobika bobele na mapa te.’”

211 Ntango bakangaki Ye kuna na mbalasan, etonga wana ya zabolo, basoda wana ya Roma, bakangaki maboko na Ye na mokongo na Ye, pe babetaki Ye fimbo ya kekele pe ya singa libwa na mokongo, kino kokokisama na esakweli ya basakoli. “Kasi Azokisamaki mpo na masumu na biso, abetamaki mpo na

masumu na biso ya nkó, etumbu oyo eyeli biso kimia ekweli Ye, pe na mapipi na Ye nde tobikisami.” Pe ntango agumbamaki. . .

212 Basoda bakangaki Ye eteni ya elamba na motó, pe babetaki Ye mokekele na motó. Pe batambwisaki yango moko epai na mosusu, pe balobaki: “Soki Ozali Mosakoli, yebisa biso nani abeti Yo. Tokondima Yo.” Ná kosekama wana, pe nsoi ya milangwa ya basoda na elongi na Ye!

213 Zabolo alobaki: “Wana ekoki kozala Nzambe te. Wana ekoki kozala ata mosakoli te. Azali mokosi.” Kozangáká koyeba ete Makomi esengelaki kokokisama.

214 Boye tomoni Ye komata na Kalvari, botala Ye. Nalingi liyangani oyo ézwa emononeli na Ye. Tozonga sima, mwa moke, koleka mibu nkoto moko na nkama libwa, pe bopesa ngai bokebi na bino. Molili ezipi Yelusaleme. Mpo na nini? Mbeka eboyami na Yawe. Likambo moko elingi kosalema. Wana makila ezalaki kotumbama na etumbelo, Nzambe aboyaki yango. Mbeka ya solo ezomata nzela na balabala. Nakoki koyoka eloko moko kotutana. Botala, ekulusu wana ya kala ya bengeté-bengeté yango wana ezokende, etumbu ya liwa ya Baroma, epesami na Moto moko oyo asali eloko te.

215 Pe nakoki komona mwa mwasi moke kopota mbangu liboso, pe koloba: “Eloko nini asali soki bobele kobikisa babeli na bino pe kosekwisa bakufi te?”

216 Moto moko azipolaki ye mbata na elongi, pe alobaki: “Bokondimela nganganzambe na bino liboso bondimela mwasi wana? Bolongola Moto ya ndenge wana!”

217 Tala mokoto na Ye. Mwa matono ya motane ezali bisika nyonso, na mokongo na yango. Wana ezalaki Ye kokoba komata ngomba, matono yango ekobaki kokoma minene. Sima na mwa ntango, yango nyonso ekomaki moko. Eloko moko eyeli kotangela Ye. Ezali nini? Ezali nde Makila na Ye. Pe ekulusu wana ezali kotika matambe ya Momemi na yango wana ekobendama.

218 Nakoki komona nzoi wana ya liwa kopusana kuna, kosaláká makelele zingazinga na Ye. “Nakozwa Ye sikawa. Soki Azalaka mosakoli, Alingaki ko—Alingaki kosala eloko moko kuna, ntango babwakelaki Ye nsoi na elongi. Soki azalaki mosakoli, Alingaki kosala makambo oyo Azosala sikaoyo te. Nayebi ete nakozwa Ye.”

219 Boyebi, nzoi nyonso, nyama mike nyonso, ezalaka na etengú kati na yango, pe tonga wana ezalaka eloko moko mabe.

220 Pe liwa ezali na etengú kati na yango. Kasi Nzambe asengelaki kokoma mosuni. Ekokaki koswa mosakoli pe kokanga ye. Ekokaki koswa moyengebene pe kokanga ye. Eswaki Dawidi pe ekangaki ye. Kasi awa boye ezali nde Nzambe, pe ayebi yango te. Nzoi oyo ebimeli na lifelo, ékosala makelele zingazinga na Ye. “Nakozwa Ye.”

221 Kasi soki nzoi ekotisi etengú na ye na bozindo mpenza, ekobimisa etengú na ye na libanda.

222 Pe na ntango nzoi ya liwa wana ekokaki kokotisa etengú na yango na moto lokola ngai to yo, ekoki na yango kopalangana. Kasi nzo—nzoto moko esilaki kolengelama; kasi ntango ekotisaki etengu wana kati na Yawe, mosuni na Nzambe, oyo ekelamaki, na mposa na nzoto te. Ntango akotisaki yango kati na mosuni wana, abungisaki etengú na ye. Boye, azali lisusu na etengú te.

223 Kokamwa te ete Mosantu monene Paulo akokaki kotelema, ntango bazalaki kotonga esika moko mpo na kokata ye motó. Alobaki: “Ô liwa, wapi etengú na yo? Lilita, wapi elóna na yo? Kasi matondi na Nzambe, Oyo apesi biso elóna na nzela na Nkolo Yesu Klisto.” Iyo.

224 Ô, ntango moto asimbi emononeli wana, makambo nyonso oyo etikali ékoya na sima. Mombongo na yo ékoya na sima, makambo nyonso oyo etikali. Te, ékopesa lisusu motungisi mingi te. Okoumela awa bobele mpo na mwa ngonga moke, kasi Yango ekomi liboso. “Ekozala na litomba nini soki moto abungisi. . . azwi mokili mobimba, pe abungisi molimo na ye?”

225 Zakai! Ô, Zakai! Ntango mosusu ezali Rebeka te, oyo azobondela na ndako, kasi ntango mosusu ezali nde mama moko oyo asilá kokatisa na ngambo mosusu ya ezipeli. Mabondeli na ye evandi naino na etumbelo na Nzambe. Soki ezali bongo, Zakai, bima sima na nkasa ya sikomore wana na mpokwa oyo; motole ya endimeli ya denomination oyo ozokangama na yango wana, oyo ezangi Mbotama ya Sika; eloko wana oyo ozokangama na yango, pe otikála kozwelá yango ndanga te, ete Nzambe azali na kati na yango. Ayebi malamú esika oyo ovandi. Mpo na nini okosala yango te?

Togumba mitó na biso mwa moke.

226 Nzambe na Nguya nyonso, Yawe monene pe ya nsomo Oyo angulumaki na Ngomba Sinai, na lolenge ete bato balobaki: “Tika Mose áloba kasi Nzambe te, soki te tokokufa.” Loba na mpokwa oyo, Tata na biso na Likolo, na mawa pe na bolimbisi, kati na mitema ya bato oyo bayebi Yo te. Pe tika bango bayeba ete ntango nde yango oyo. Mpo, ntango mosusu bazali komibomba na sima na mombongo na bango. Ntango mosusu bato ya mombongo bazali ebele awa, Tata, baoyo—baoyo bayebi Yo mpenza solo te. Ntango mosusu bazali bandimi ya lingomba moko boye, pe tokoloba mabe moko mpo na yango te. Kasi naino babotamá mbala ya mibale te. Bazoyeba ntina na yango mpenza te.

227 Pe toyebi ete ata mwa mokoloto moko to litono moko ekolongwáká na Liloba na Yo soko moke te. Olobaki: “Likolo pe nse ekoleka, kasi Liloba na Ngai ekoleka te.” Pe Olobaki: “Soki moto abotami mbala ya mibale, na mai pe na Molimo te, akokota na Bokonzi te.” Nabondeli, Tata, na mpokwa oyo, ete Óloba na

mitema na ngonga oyo. Tika ete basi pe mibali bakanisa malamumu mpenza, na ngonga oyo, na koyebaká ete tozali kobika na ntango ya suka.

²²⁸ Yisalaele azali o mboka na ye, manaka monene ya Nzambe. Azali kozonga epai na ye, koluká-lukáká: “Masiya azali wapi?”

²²⁹ Toyebi ete ntango Yosefe amitalisaki epai na bandeko na ye, abimisaki bai-Mabota libanda na ndako. Mwasi na ye pe bana bazalaki na kati na ndakomokonzi. Esengeli bai-Mabota banetolama, mpo ete Yisalaele ayebana. Bongo ntango ya mawa pe ya koganga pe ya kolela ekoya: “Ozwaki bampota wana wapi?”

²³⁰ Alobaki: “Na maboko na baninga na Ngai. Bampota na maboko na Ngai oyo euti na baninga na Ngai,” na ndako oyo esika Asengelaki koyambama malamumu, ntango Akomilakisa na Yisalaele lisusu.

²³¹ Nzambe, wana libaku malamumu epesameli bai-Mabota, tika ete babongola mitema noki-noki pe báya epai na Yo.

²³² Wana togumbi mitó, Zakai, nalingi ete na mwa ngonga moke oyo ózala sembo mpenza, ba-Rebeka, pe lokola. Na mwa Liteya ya biteni-biteni oyo, soki eloko moko elobeli yo na motema pe elobi: “Naino nayambá ebikeli ya—ya Molimo Mosantu wana te, Nsango-malamumu mobimba, kasi nakolinga kozwa yango. Nalingi okanisa ngai na libondeli, Ndeko Branham. Nakotombola bobele loboko, epai na yo te, kasi epai na Nzambe.” Pe loba: “Bondela mpo na ngai.” boye nakosukisa libondeli, na kokanisáká yo. Nzambe apambola yo. Nzambe apambola yo, yo, yo, yo, maboko koleka pene na zomi na mibale.

²³³ Bokoloba: “Yango ezali na litomba nini, Ndeko Branham?” Ya solo mpenza. “Ntina na yango nini?”

²³⁴ Botala, science elobaka ete okokoka kotombola loboko te, na ndenge ezali. Mpamba te, na ntina nini? Nguya ya bobendi na mabele ekokitisa loboko na yo na nse. Kasi ozali na molimo ya bomoi kati na yo. Pe bomoi wana oyo ezali kati na yo, Bomoi mosusu eyeli yango pe elobi: “Ozali na libunga.”

²³⁵ Pe obuki mibeko ya science, pe otomboli loboko wana epai na Mokeli yango, pe olobi: “Kanisa ngai.” Akosala yango. Soki osali yango na motema solo mpenza, Akozwa yo na maloba na yo. Nzambe apambola yo kuna na sima. Moto mosusu azali sikawa liboso tosukisa? Nakosala bobele mwa libondeli moko ya mokuse, nakobondela na mwa ngonga moke. Nzambe apambola yo, misié. Nzambe apambola yo. Moto mosusu azali?

²³⁶ [Ndeko mwasi moko na kati na losambo atangi mwa Makomi—N.D.E.] Amen. Ezali na ntina na ngolu, mwa mosali ya mwasi oyo atelemaki na nse ya Molimo, alobi na ntina na elaka.

²³⁷ Okolinga—okolinga kotombola loboko soki osali yango naino te? Pe loba: “Bobele. . .” Yango nde nyonso oyo nakosenga na

bino bosala. Kotombola bobele loboko na yo, komiyeba ete ozali na libunga, pe osengeli na ngolu. Ndako ezali polele. “Liziba moko ezali na ndako na Dawidi, ezali polele mpo na lisumu pe mbindo.” Okoyamba yango na mpokwa oyo, moto mosusu azali, liboso tosukisa sikawa? Na kati na ndako oyo, ezali na maboko ntuku minei, ntuku mitano, ya mibali pe basi, bilenge pe mikolo, batombolaki maboko na bango. Malamu. Nzambe apambola yo, misié. Malamu.

Tobondela.

²³⁸ Nkolo Yesu, nandimi ete maboko oyo etombolami na bosembo ya bozindo mpenza koleka. Oyebi eloko bango bazoluka. Oyebi mposa oyo etindi bango basala bongo. Pe nabondeli, Tata na Likolo, ete ngolu na Yo ya Bonzambe ekitela moko-moko na bango. Tika mpokwa oyo ézala ngonga ya mbongwana. Tika ete bakita na nse ya nzete ya Mofalisai lofundo. Tika ete bakoka kokita na nzete, baya liboso na Yesu Klisto, pe bálوبا: “Nkolo, soki nasalaki mabe, nalingi kobongisa yango.” Pe uta na mwa ndako ya kolia oyo na mpokwa oyo, Tata, Okozonga pe na ndako elongo na bango, pe Olia elongo na bango, pe Ótikala elongo na bango na bomoi oyo mobimba pe ya Seko nyonso. Okolinga kokokisa yango, wana nazali kobondela epai na Yo na ntina na bango?

²³⁹ Olobaki: “Moto moko akoki koya epai na Ngai te soki Tata na Ngai abendi ye liboso te. Pe baoyo nyonso Tata apesaki Ngai bakoya epai na Ngai.” Olakaki yango.


²⁴⁰ Pe sikawa, Nkolo Nzambe, baoyo boye bapesami lokola mbano ya ngolu pe ya bolingo. Bazali na maboko na Yo, moto moko akoki kobotola bango te. Na mitema na bango polele ya bosembo, pe eyambweli ya bosembo oyo basali, ete balingi kolongwa na ba-nzela ya mokili, pe kolanda ba-nzela ya Nzambe, na bomoi na bango.

²⁴¹ Yamba bango, O Nkolo, nasengi, wana nazoloba mpo na bango, pe natelemi liboso na Ngwende na Yo monene ya Mpembe. Na kondima, totelemi wana, tozotala Ngwende na Nzambe oyo ya mpembe ya nzoku, wana Mbeka ya Makila elali liboso na biso, ezali kolobela eyambweli na biso. Sunga bango, Tata. Napesi bango epai na Yo lokola makabo ya bolingo, na Nkombo na Yesu Klisto. Amen. Amen.

²⁴² Sikawa, bino nyonso oyo botombolaki maboko, nalingi kosenga bino bosala eloko moko mpo na ngai. Nalingi ete bokende kokutana na batei mosusu oyo bazali awa, pe boyebisa bango ete bondimi Klisto lokola Mobikisi na bino, pe bolingi ete bobatisama, pe bolingi ete botondisama na Molimo Mosantu. Pe Nzambe akokokisela bino yango.

²⁴³ Sikawa, nazalaki kokanisa eloko mosusu, kasi tokozwa ntango te, mpo ngonga ya kokanga esika oyo etikali—etikali soko miniti mitano, kasi to—tosepeli na motema na bino molai.

²⁴⁴ Pe maboko na bino nyonso oyo etombolamaki, sikawa, nayebaki mpenza esika ezalaki te, ezalaki na bisika nyonso. Kasi ntango otombolaki loboko, na ntembe te bosalaki yango na motema moko. Okotombola loboko te bobele mpo na kotombola. Soki osalaki bongo, wana ezali kozala na lokuta. Tombola loboko na yo. Kosala eloko moko te longola bobele soki ozosala yango na motema moko. Pe ntango ozwi mokano wana, pe na nse na motema ondimi ete osili kosala yango, bongo tambola na motema solo na yango. Nzambe akokumisa yo.

²⁴⁵ Loba, na bongo, bosilá koyeba eloko nini ekomelaki Zakai? Bolingi koyeba eloko nini ekomelaki ye? Akomaki moko na bato ya Lisanga ya ba-Hommes d’Affaires Du Plein Evangile ya Yeliko. Yo pe, okolinga kokota na lisanga yango te? 

ZAKAI, MOTO YA MOMBONGO LIN63-0121
(Zacchaeus, The Businessman)

Liteya ya Ndeko William Marrion Branham oyo, eteyamaki liboso na Anglais na mokolo mwa mosala moko na mpokwa, mokolo mwa 21, sanza ya yambo, na mobu 1963, mpo na elambo ya Association International Ya ba-Hommes d'Affaires Chretiens na Ramada Inn na Tucson, Arizona, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org